

21. maj. 2019

**Angajoqqaat atugarisaannik ilisimasaqarfimmik qitiusumik katersuiffeqalernissaanik pilersitsisoqarnissaanik apeqquteqaat aallaavigalugu oqallisissiatut siunnersuut. Oqallisissiatut siunnersuutip siunertarissavaa angajoqqaat atugarisaanik ilisimasanik katersuiveqalernerup kingunerisaanik Angajoqqaatillersuisuanik pilersitsinissamut tunngavissaqalernissaq.**

Jens NapãtôK, Partii Naleraq apeqquteqaat aallaavigalugu oqallisissiaanut qujavugut. Oqallisissiap imarisaa soqutiginarluinnaqqissaartuq tunngavimmigullu pingaarutilerujussuarmut qujalluta, imak oqaaseqarfigis-savarput.

Isumaqatigilluinnarparput angajoqqaajunermi akisussaaffik annertummat. Angajoqqaajunermilu ullormiit ullormut suliaarpasuit pisinnaasarmata, tamannalu akisussaaffik angivoq. Angajoqqaat atugarissaartut atugarissaanngittullu atugaat tamarmik annerusumik minnerusumilluunniit unamminartorpassuaqartarmata aamma ilisimavarput. Angajoqqaajunermiuna pilluarnartorpassualik akerlianillu aamma ilungersornartorpassualik, taamaattoq pingaarnerpaaq tassaavoq meeqqamut asanninnissaq sapinngisamillu perorsaalluarnissaq.

Meeqqap avatangiisanit ulluinnarnilu attavigisaanit tamanit pingaarnerpaat tassaapput angajoqqaat. Sutigit tamatigit meeqqamut sorlaqarfiusut, tamatigullu tulaavissatut siulliujuartariaqartut. Ilaqutariinnerullu nukittoqutigaat aanaakkut aataakkullu ilaqutariit ilaanni tapersersuisuusarmata. Tamanna nukittoqutaasoq inuiaqatigiit ilutsinni nukittuffitta pitsaasut ilagaat.

Angajoqqaajuneq nuannersuuvoq, pilluarnartuq ilaatigit assoruunnartuq taamaattoq qanorluunniit atugaqaraluaanni killissaq tikillugu assoruunnarfeqarsinnaasartuq. Inuppassuuvugullu assigiinngittut ilaqarpugullumi nukissaqarluartunik, akerlianilli ilaqarpugut isummersortariaqakkanik allatigullu tapersersortariaqakkatsinnik. Angajoqqaallu kisimiittut arlalitsigut unammillernarsinnaasunik nalaataqarsinnaasarmata kaammattorusunnarput peqatigiiffittut ingerlassinnaasaminnik aallartitseqqullugit. Avitseqarluni nutaanik isumataaneq ineriartortitseqataasarmat.

Siunnersuuteqartup anguniagaa tassaavoq angajoqqaat illersuisuannik peqalernissaq. Angajoqqaat atugaannik ilisimasaannillu qitiusumik katersuiveqarnissaq siunnersuuteqarnerup anguniagassatut takorlooraa paasivarput. Tamatumingga Siumut isumaqarpoq angajoqqaat namminneq akisussaassuseqarlutillu oqarsinnaammata illersorsinnaallutillu illersuisoqarnerinnakkut pitsanngorsaasinnaaneq piviusorsiortuunngitsoq. Akerlianik qujanarpoq meeqqat taamatullu inuit innarluutillit illersuisoqalermata, inuit imminut illersorsinnaanngitsut sinnerlugit oqaaseqartartoqarmat. Maannakkut Peqqinnissaqarfiup ataani MANU ingerlanneqarpoq. Angajoqqaanngortussat<sup>1</sup> qanoq ilitsersorneqarlutillu pikkorissarneqarsinnaanerat periarfissaavoq.

Kommune ataani ilaqutariinnut sullissiveqarpugut.<sup>2 3</sup> Taakku saniatigut inuit oqaloqatigiittarfii assigiinngitsut pilersinneqalereersimalerput. Immersoqatigiissinnaaneq avitseqatigiiffiusumillu immersoqatigiissinnaaneq arlalitsigut ammaaneqarnikuupput. Inuit namminneq kajumissusermik susassareqatigiinnerup aqqani suliaqartut nersualaagassaapput, tamatuminggalu ineriartortitsineq pillugu kaammattuinnissarput siammartertuartaqarparput.

Siunnersuuteqartup isumaanik qanillattorsinnaasut allat piukkunnarsinnaasut makkuupput: Angajoqqaanut inersimasunut kisimiittunullu pikkorissartitsinerit. Massakkut Peqqinnissaqarfiup kissaateqarnera naapertorlugu Kommune ilaanni Kommuneqarfik Sermersooq atortaligaani atorneqallattaalerput inuit perorsaanikkut ikorfartuillutik ilitsersuussisinnaasut. Ornigullutik angajoqqaasumut ilitsersuinikkut inerisaaqataasinnaasut. Periutsip tamassuma kommuneni allani atorneqartalernissaa Siumumiit kaammattuutigaarput.

Angajoqqaat assigiinngitsunik pingaartillit naleqartitalillu amerlasuujupput. Angajoqqaat kisimiittut atugaasa oqilisaavigineqarnissaat pillugit Kommune pisussaaffeqarpoq ikorfartuissalluni aqqutissieqataassallunilu. Taamaattorli sunaluunniit inerisarneqartillugu nutaaliortoqarsinnaavoq, tamatumingga Siumut peqataassaaq. Oqallisissiamullu qujavugut qanortorlu oqallinneq nuannersumik uummaarissumillu ingerlalluarili.

Qujanaq.

---

<sup>1</sup> [https://www.peqqik.gl/kl-GL/Emner/Gravid/MANU/MANU?sc\\_lang=kl-GL](https://www.peqqik.gl/kl-GL/Emner/Gravid/MANU/MANU?sc_lang=kl-GL)

<sup>2</sup> <https://sermersooq.gl/da/forvaltninger/Boerne--og-Familiecenter-Nuuk> (Kommune allat aamma peqarput)

<sup>3</sup> <https://www.kujalleq.gl/Soeg?query=Ilaqutariinnut+Sullissivik>